



道古堂文集卷三十九

墓誌銘二

大學士贈太保文莊梁公墓誌銘代

皇帝御宇之二十有八載相國錢唐梁公以疾薨於位

上聞震悼

命

皇五子詣靈奠醴晉贈太保諡文莊

子入賢良祠

賜內庫白金千兩治喪公有子遠守遵義乞內侍養已



調戶部郎中道遠尙羈職守

上念旅邸無人

命內務府派員經理其事部察郵典具奏

諭祭葬如例入祠加祭一壇

令翰林院立傳啓殯之日復奉

恩旨所過沿途二十里內官弁並赴舟次弔奠遣人護
送哀榮禮備冠絕寮案公起自田閒受

兩朝不世之知遇回翔館閣出入

禁闈洊歷卿宰以至延登受策

隆恩渥澤古罕倫比而筋力且就衰年運不我與高厚

之恩待酬於萬一報國之心積縈于寤寐公雖死而目
猶未瞑也葬有日矣隧道之銘孤子排纘行事先期來
請余與公同備

顧問參密勿朝夕繼見垂三十載知公特深其忍不銘
按狀公諱詩正字養仲號薌林梁氏系出新里所考者
善菴公積從宋室南渡爲遷杭始祖著籍錢唐曾祖萬
鍾祖國儀隱德不曜皆以公貴
贈光祿大夫

經筵講官太子少師協辦大學士吏部尙書曾祖母汪
祖母施並贈一品夫人考谿父公諱文濂歲貢生選授

諸暨縣學訓導不就以公貴累封如前母凌累贈至一品夫人公生有異稟五歲始能言授以四五言詩畧上口卽能誦長擅文譽與兄啓心有二難之目年三十始舉鄉試又五年成進士時雍正八年庚戌也

殿試以一甲第三名及第授職編修旋充一統志纂修官未散館出典山東鄉試爲正考官明年癸丑充會試同考官又明年選入

上書房得侍

今上皇帝暨誠和兩親王講讀九月充

日講官起居注十月晉侍讀明年晉侍講學士凌太夫

人病亟乞假遽歸驚聞

世宗憲皇帝賓天已擬束裝疾赴

梓宮哭臨先一日而凌太夫人卒督撫上聞

賞藩庫銀五百兩治喪未期年

詔起入直

南書房垂問塗次病瘡狀

賜御醫并參藥

諭令以素服入直照現任學士例給俸兼

懋勤殿行走

賜外城第宅一區甫釋服補授侍讀學士充

日講官起居注仍兼阿哥書房行走是冬充順天武鄉
試正考官旋晉內閣學士兼禮部侍郎即日充經筵講
官乾隆四年正月補授刑部右侍郎五月調戶部兼理
錢法五年條奏旗丁事宜蒙

俞允十一月轉左謝錢法事六年谿父公年屆七十
恩給二品封典

御製五言律詩

御書傳經介祉四字以賜四月奉

命仍兼錢法事務七月扈從木蘭十一月兼吏部右侍
郎事是年充

皇清文穎館總裁官七年二月扈從恭謁

泰陵四月充

殿試讀卷官旋

命閱新進士朝考卷是年兼

御書處行走八年七月

皇上親謁

祖陵駐蹕盛京公與扈從

上升殿大宴蒙

恩召赴榻前手賜一卮時與者不過數人九年六月
賜書清勤堂三字扁額是冬扈從盤山

宮門去內殿稍遠每遇宣喚

恩許乘騎而行重葺翰林院落成

車駕臨幸

錫宴賦詩賞賚有差公以侍郎

特恩照尙書品級優賜十年二月扈從謁

東陵五月補授戶部尙書奉

命閱新進士朝考卷七月扈

駕幸多倫諾爾十有一年九月扈從謁

泰陵詣五臺十有二年六月充續文獻通考館總裁官

七月扈從木蘭十有三年正月扈

駕東巡謁

孔林次祭嶽廟登泰岱

上以山徑險仄

諭公不必隨上沿嶺派侍衛分駐有交辦事遞傳上下

三月奉

命閱會試迴避卷四月調補兵部尙書又

命閱新進士朝考卷九月扈從謁

泰陵金匱梗化大學士傅公奉

命經畧羽書旁午一切臺站事宜資公調撥十有四年

金川報捷

特加太子少師十一月奉

旨暫管吏部尙書事

賜御書宣贊樞衡四字扁額十二月兼翰林院掌院學士充

日講官起居注旋

命協辦大學士事十五年正月補授吏部尙書協辦閣務如故兼教習庶吉士八月扈

駕時巡中洛謁

東西二陵以朱荃事奏對未協罷掌院學士職公經歷四部遞長六官夙夜在公殫竭心力期盡職而後已其

佐司寇也盡心庶獄研精律例曹司有通曉刑法者虛懷諮問獄無疑義奇請他比情罪允協暨筦中樞上以經畧與大將軍向無區別

命公釐定章程公博考前典參酌今制自禡祭啓行至凱旋告廟條上儀注載入會典及掌銓衡振淹滯抑躁進不徇請託不避嫌謗官方澄叙胥吏歛手在農部最久清釐錢法稽核經費懲各司奏銷之延閣綜直省正耗之盈虛精於心計者不能及也

聖主倚毗旣深任寄尤篤明良一德朝野矚望揆席之端兆於此矣十有六年

六飛南幸谿父公年臻大耄公預請扈
蹕歸省

恩給一品封典

聖駕駐蹕杭州越三日奉

命閱召試諸生卷

御製七言律詩以賜並給假一月侍養

御書湖山養福四大字賜谿父公台階愛日四大字賜
公

天章下賁焜耀里閭假滿還

朝從

幸木蘭恭逢

皇太后六十萬壽

覃恩頒詔封本身一品明年以谿父公失明陳情乞養

御製五言律詩寵行有翻祝歸朝晚卿家慶倍深之句

聖情肫篤不異家人父子家居二年奉

命與長洲沈少宗伯德潛同修西湖志纂二十有二年

六飛重幸江浙星赴淮陰接

駕

恩賜在家食俸時尙書汪由敦假歸省墓

命公隨往江寧代攝其事

賜御製七言律詩又

賜御書萊衣晝永四字扁額奉

命閱兩江士子詩賦卷扈

蹕至金山行在

聖恩體恤

命歸省侍無何遭谿父公之變伯兄亦以毀卒熒熒在
疾獨營幽窶

特詔以工部尙書起用陳情乞假數月畢葬事明年春
就道復調署兵部尙書又奉

旨於紫禁城內騎馬八月充順天鄉試正考官又明年

奉

命磨勘會試卷五月閱庶吉士散館卷卽奉

命教習庶吉士服闋實授兵部尙書十二月

命署掌院事務兼續文獻通考館總裁官二十有六年

二月扈

駕巡幸五臺四月

命磨勘會試中式卷旋充殿試讀卷官復

命閱新進士朝考卷五月補授吏部尙書協辦大學士

仍兼掌院學士事又補充

經筵日講官起居注是冬恭遇

皇太后七旬大慶敬接

徽號冊寶于

慈寧門奉襄典禮先後奉

懿旨并

上賞賚較廷臣有加二十有七年順天鄉試仍爲正考官二十有八年六月拜東閣大學士之

命仍兼吏部尙書翰林院掌院學士事九月

賜內城第宅一區十月晉加太子太傅十一月以微疾遽薨遺疏不及上公天性孝友太夫人前逝諱辰及歲時饗祀輒嗚嗚作孺子泣侍谿父公色養倍至事伯兄

飲食必借弗敢先也弱弟爲谿父公晚年所舉子愛念尤篤俸餘贍給之外分財產與之子姪並三族待以舉火者不能悉數也自入仕以至爰立不傍門戶不矜巧捷朴誠自矢獨結

主知讒公者莫能入愛公者亦莫能助也薦剡人才封章慎密倖進之徒末由關說左右親近無從窺伺焉總裁各館鉅細皆謹手定去取精當詳要適職巨製鴻裁折服羣彥文章訓詞深厚瓣香南豐詩骨蒼秀廢和明廷韶英繼響玉石均調遠播

皇風仰合

聖製爲宋元以來侍從之臣所不及臨池初學誠懸繼
參文趙晚師顏李格凡三變奉

命編校秘殿珠林石渠寶笈二書益得縱觀

天府收儲詣力精專天情流美經進時獨蒙

睿賞屢勒堅珉同列推爲第一公生康熙丁丑二月四
日薨于乾隆癸未十一月十有四日壽六十有七初娶
于孫繼以包累贈一品夫人再繼以徐以子官得贈如
前公子二長同書乾隆十七年

恩賜進士日講官起居注翰林院侍講以後伯兄次敦
書乾隆十二年舉人

恩賜一品廕生貴州遵義府知府女子子二長適舉人
廣東清遠縣知縣范同治次適太學生吳琰兩子一女
皆包夫人出一女徐夫人出孫男三長玉繩仁和縣學
附生次履繩次應繩孫女一今以三十二年二月癸丑
葬於邑南之象山三夫人祔焉銘曰

梁祖伯益以國爲氏公侯子孫必復其始顯允梁公早
宅

帝衷甘盤舊學四輔道隆發聞詞垣遍歷華省四長六
官文柄屢秉

天子幾暇典學不懈公爲益稷賡歌颺拜

萬乘巡游雅雅魚魚公爲臯朔常在屬車南浮江淮東
登嵩泰瞻洛觀河經覽九塞公和其聲金春玉應每奏
一篇輒動

清聽筆跡淵妙鳳泊鸞停琬琰深刻照耀

闕庭公佐

唐虞以道自許爲世舟梁爲國風雨出入綸扉從容丹
地朝夕論思不我遐棄公乘白雲仿徨九閭景短心長
恐孤

國恩丹忱縷縷沒而猶視我知公深銘告惇史

資政大夫禮部右侍郎齊公墓誌銘

天台齊氏有圯族之逆子曰周華少溺於呂留良之邪
說伸論黨護應寘重典邀

恩寬宥跳身遠走閱三十餘年然後歸歸而出妻屏子
通族擯而不齒益復斥賣田宅盡刊其非聖無法之言
巡撫熊中丞學鵬方閱視台州城工遮道獻其書并列
其宗人前禮部侍郎召南十罪中丞上其書於

朝以其人磔死其近族弟姪并子孫論大辟者凡十人
聖慈止戮其子孫餘皆釋弗論而逮禮部至京法司當
公狗隱之罪而盡籍其產

皇上鑒公無他僅子革職還其產之十三四爲其餽粥

之地旋

命歸里恩膏汪濊旁觀皆爲感泣况其身受者乎公易直子良朴誠自矢爲

主上所深知橫遭宵小之玷縈紆趨悶無由自白於聖人之前舟車刺促內鬱外勞抵家甫匝月疾作遂不可爲時乾隆三十三年五月二十三日也貧無以殮孤子鬻其餘田以給喪事某年月日葬於先人之阡苴杖麻經遠走千里踵余門而乞銘余與公同試詞科同官翰苑性情嗜好無一不合不獨文章學問之益也其忍不銘齊之出有二太公之後子孫以國爲氏衛大夫齊

子之後子孫以字爲氏此夾際鄭氏之言也世遠不可考信公自撰年譜矜慎不敢妄定據其近代之可徵者曰先世汴之祥符人隨宋南渡僑寓杭州有諱盛者由進士官宣義郎始占籍天台是爲天台之始祖四世祖莊卿洪武初以人材薦授湖廣房縣知縣七世祖汪正統丙辰進士官兵部車駕司郎中扈蹕殉土木難曾祖父諱之仲早卒曾祖母許氏守節撫孤事載郡邑志從祀節孝祠祖諱化龍以潛德孝義聞於鄉祖母徐氏父諱轟字省齋邑文學母張氏自曾祖以下皆以公貴累贈至資政大夫禮部右侍郎妣皆贈二品夫人公名名

南字次風號瓊臺晚號息園省齋公生五子公其次也
幼而穎敏六歲解屬對九歲五經成誦鄉里稱神童十
二歲應郡試省齋公攜至郡登巾子山吟五言云江水
連天白人烟滿地浮巾山山上眺一覽小東甌識者卽
以公輔器相品目與兄周南出就外傅青燈布被攻苦
連日夕弟圖南世南道南皆從公學友愛彌篤年十六
充博士弟子二十三督學新城何端簡公世璣選拔入
成均十一郡貢生成集端簡指公稱於衆曰此我
朝奇士當以王姚江一輩相待也雍正七年己酉科鄉
試中副車十一年癸丑

詔復詞科之制明年督臣上蔡程公元章學臣奉新帥
公念祖以博學鴻詞薦乾隆丙辰

皇帝紀號之元載

名試之士羣萃

闕下凡百八十四人試於

保和殿

欽取一十五人君名在二等第八改翰林院庶吉士卽
充

大清一統志纂修官明年散館授檢討三年四月京察
一等加一級四年六月充

武英殿校勘經史官十月充明鑑綱目館纂修官六年
三月以一統志館議叙列一等加一級八年四月
御試翰詹官於

圓明園列優等六月晉右春坊右中允十一月轉左以
原銜署

日講起居注官

召對於

養心殿西煖閣旋晉翰林院侍讀以原銜充

日講起居注官九年丁省齋公艱戴星而奔哀毀骨立
前曾承辦禮記漢書考證十年

諭旨仍令在籍編輯陸續交

武英殿經進十一年三月綱目告成議敘仍列一等奉
旨於起官日加一級服闋入都奉

上諭仍著在

武英殿校勘經史十二年二月補原官三月經史館告
成議敘加一級旋充

大清會典纂脩官四月京察一等署

日講起居注官五月

召對於勤政殿校勘通志通考晉侍讀學士充續文獻
通考館纂修官主順天武鄉試以原銜充

日講起居注官十三年戊辰會試充同考官五月
御試翰詹官於乾清宮榜未發奉

上諭在阿哥書房行走以一等第一名擢授內閣學士
兼禮部侍郎甫一月補授禮部右侍郎

上於寧古塔得古鏡以來歷未詳問朝臣莫有對者公
具悉原委并其款識以對

上大悅諭左右曰是不媿博學鴻詞矣八月

召對於勤政殿越日復於養心殿西煖閣

召對九月初五日禮部於西苑樓前侍班伏觀

御射發十九矢皆中的

上騎還

圓明園顧尙書蔣溥與公曰不可無詩公於翼日進詩
四首序一篇

上卽俯和

命內監持稿示公知遇之隆罕有倫比旋充續文獻通
攷館副總裁官侍班暢春苑大西門樓奉

特旨勘定通禮十四年正月

召對於西煖閣四月充

冊封婉嬪副使二十九日自

圓明園直

上書房歸澄懷園甫及門馬驚墮觸大石負重傷幾不藥程學士景伊亦自

上書房歸驚馳入告

上爲動容賜藥三瓶

特遣中官就寓探問傳蒙古醫療治病少定

上見阿哥果親王頻問汝師傅病勢如何須時差人探問又見奏事大臣

天語垂問病狀後於木蘭圍場中又

問阿哥九月回

鑾又

問大學士尙書

賜乾鹿肉十五束

聖眷隆厚雖慈父母之於子無以加也十月病稍間詣宮門請

聖安

召對於弘德殿行步猶艱

天顏惻閔曰汝病尙未愈須加意安養公因口陳懇解職任回籍省侍老母

上慰畱再三堅請益力

上言冬間風寒如何行路慰諭欵曲十一月具摺哀懇

俟春和由長船回南

上始可其奏猶傳太醫劉裕鐸邵正文診脈處方公單門寒素起自田間不藉引援不由推轂荷

聖主特達之知論有根柢辭無枝葉肫誠朴茂溢於眉宇望而知爲端人碩士晝日三接一歲九遷受寵若驚奉身若不及

天鑒密微一誠相感蓋不獨以其學優而文贍也自通籍以來

聖恩優渥錫賚便蕃不可勝紀其同詞科諸臣拜賜者則日知齋說

御製喜雪石刻紗葛筆墨端硯其同翰苑諸臣拜

賜者則日講春秋樂善堂文集

世宗憲皇帝御製文集

欽定四書文

世宗憲皇帝上諭其同綱目館諸臣拜

賜者則明史其同翰詹諸臣優等拜

賜者則

御製元宵聯句石刻紗葛筆墨其因考試而拜

賜者

御製石刻硯墨筆等物其

賜詞林典故則

名對於勤政殿也其同

上書房行走諸臣拜

賜者則

御書敬勝堂法帖貂挂龍箋對聯筆墨以及鹿肉大魚
山雞鹿尾挂麩藕粉葛粉荔枝蓮子青菓嘉慶子豐貂
文綺挂包手帕福字凡三

賜焉起程又

賜紗葛各二抵家太夫人適患痰喘臥牀第聞公至起
謝

天恩執公手曰汝果來乎勿藥而愈十六年

翠華南幸公恭迎於吳江八測河岸

上遙顧曰汝已好耶隨向

行在請

聖安卽

名見詢問病體及老母健飯否

諭以汝能奉母讀書自然復健汝第安養不必步步相
隨

賜克食并內緞二紫貂四十一月太夫人棄養明年十
月合葬考妣於三十一都苑坑之原十九年二月服闋

制府喀公請為紹興蕺山書院山長冬喀公復請主福
建道山書院以道遠辭巡撫周公聘主杭州敷文書院
二十二年

上復幸浙公於無錫北之迎龍橋迎
駕尙未奏名

上望見卽問汝今已好耶隨詣
大營盤請

聖安卽
名見垂問病勢加減及書院人文奏對良久遵
諭先至杭

上駐蹕蘇州

命軍機處賜墨刻一卷內緞四疋二十八日於西湖
行宮恭進頌冊蒙

賜大緞六疋二十六年十月叩祝

皇太后萬壽入京恭請

聖安卽蒙

召對慰問良久內監扶起與尙書長洲沈德潛奉

旨仍赴上書房與諸阿哥相見以詩文質正辰入未出
有扶掖者不拘常儀十一月二十五日朝賀

皇太后萬壽

內監扶起同上當加一命字

賞內緞三疋挂包鼻烟又奉

旨加一級加賞彩緞三疋紫貂六個

皇清文頴一部二十七年

皇上三幸浙江恭迎於吳江汪家溪亭上三十年

皇上四幸浙江恭迎於蘇州城內

行宮前俱蒙

溫旨慰問傳

諭先回靜候

皇上駐蹕西湖行宮疊受頒賞內緞越日

幸敷文書院

御製詩疊韻

命公與學臣并諸生和詩進呈

賞筆墨硯公主敷文凡十一年獎勵後進因材而篤生
徒雲集中卷盈坐至是以風痰時發懇辭歸里杜門不
出方幸棲遲化日保卒餘年不意逆人近出族屬橫遭
波累壽命不長彌留墜言自云我生不辰濱於死者有
二皆賴

聖主得以生全方馬驚墮地時首觸巨石腦髓迸流目
睛眩轉神魂飛越自分必死非夫萬金良藥孰能使元
神固而不離非夫生牛冒首孰能使真氣聚而不洩非

夫蒙古神醫徧體椎朴孰能使十二經脈漸復其本初
三百六十五骨節各還其部位三日而知痛五日而知
飢不三月而卽能起立收旣散之魄體與陰陽爭瞬息
之去畱而奪之鬼伯之手生我者父母之死而致生之
者

皇上也逆書上聞部議以狗隱擬流

聖意不測遠則新疆近則烏刺至近則寧古塔也朔風
砭骨黃沙蔽天朝狎駝馬夜鄰鬼魅羸軀殘喘填溝壑
而飽烏鳶其常也則今日考終牖下雖死猶幸齊氏子
孫生生世世宜如何其銜結以報也言不及家事泊然

而逝公口無擇言身無擇行弱不好弄而於詩書若麴
蘖著作等身石渠金鑑藏在廣內者一統志河南山東
江蘇安徽福建雲南六省皆其編輯外藩屬國徐韓向
無底本則公創稿新撰也明史綱目前紀二卷神光熹
三朝則公所輯也又與楊學士椿兼總校之任

武英殿分撰經史考證而公獨多經則尙書禮記春秋
三傳史則史記功臣侯表五卷漢書百卷後漢書郡國
志五卷隋書律歷天文五卷舊唐書律歷天文二卷嘗
言酈氏之注水經明於西北而闇於東南且域外之水
道未詳因撰水道提綱三十卷大而河海小而溪澗湖

源窮委如指上螺紋一鑿可悉又有史漢功臣侯第考一卷歷代帝王表十三卷後漢公卿表一卷宋史目錄皆其藏于家者也詩文操筆立就鋪陳終始爛若雲錦晚喜集句李杜韓蘇若出一手在葢山聽雲樓臨摹蘭亭法帖卽於原序中去其複字二百四字做千文體成三言詩十七章客有以淳化閣帖三百字求跋者卽因其字數縱橫集之頃刻成五言律十二首讀余嶺南集卽集七十餘首讀錢司寇香樹續集卽集十首贈之敏捷如此公生於康熙四十二年正月十一日年不踰中壽止六十有六云配張氏

誥封二品夫人子一式遷國子監生女二長適張緝禮次適文學潘崙甲孫女二人銘曰
赤城霞起翠屏雲蒸鍾毓神秀哲人以興繫公方聞詞科發迹笙典珠墳紛綸旁魄蹈道執禮儒林職志三篋補亡百題並試劉仲遙父心所遐慕七經釋疑兩漢刊誤珠林玉府恣公遊處鴻筆馳驟爲

國風雨慎簡

宮僚爲諸王友諫寓邪蒿敬徵醴酒吁嗟逢屯日昃退直馬驚而墮命在漏刻巫咸叫閨

聖心閔惻賜藥遣醫奪之鬼伯移席歸臥優游林泉咏

歌德化若將終焉族子獬豸不可化訓蒼蠅點壁幾隕厥問

帝念微勤弗寘於理白衣還山祝宗所死

鴻慈未酬沒而不瞑魂瞻

帝鄉長在華頂松貞栢悅幽局孔臧母忘在莒一嘗何傷碑材輪困徐俟愍綸瘞銘前和視此刻文

道古堂文集卷四十

仁和 杭世駿 大宗撰

墓誌銘三

資政大夫內閣學士兼禮部侍郎徐公墓誌銘

國家開物成務喬木與世臣恒相經緯舜臣五人臯益父子居其二粵若殷宗巫咸又王家周宣中興鄭桓公武公相繼入爲卿士三代令辟敷心腹腎腸於寮案則有公忠體國不貳心之臣咸有一德保世滋大由斯道也我

朝嗣無疆大厯服重熙累洽雲龍風虎依

日月之光者恒有象賢之胄光昭朝列近而徵之鄉國
錢唐徐氏其較著者也

聖祖仁皇帝時冢宰文敬公寅清亮直著聞清時太傅
文穆公繼之

世宗憲皇帝時填撫安徽入掌邦憲未及枋用以詔
今上皇帝延登受冊備位槐鼎霖雨天下龐鴻純嘏之
氣旁礴鬱積篤生今侍郎潤亭宗伯胚胎前光介於兩
輔非偶然也公諱以烜字養資號潤亭世家錢唐自曾
祖以上贈如文敬文穆官詳二公碑誌中公生而穎異
不苟言笑年十一卽列學官爲弟子學使者手其文以

示多士曰此徐冢宰孫也年雖稚而文境老成非私冢
宰也肄業成均舉康熙庚子京兆鄉試雍正庚戌成進
士改庶常習國書散館授編修旋充

武英殿纂修官入直

南薰殿

世宗升遐

今上皇帝卽阼時文穆總裁實錄而公爲纂修父子同
在史局詞館以爲榮乾隆戊午同考順天鄉試明年會
試復爲同考充
殿試收掌官晉國子監司業

實錄告成

恩賜筵宴表裏銀兩如例旋晉翰林院侍講文穆公在

政府以痰疾舉發請解職是日公晉學士詣

宮門謝蒙

恩召入垂問文穆公病狀慰諭再三公叩首謝奉

命隨侍回籍甫一月文穆公促命赴

闕待職都門久未得補

特恩超授詹事府少詹事蓋異數也旋晉詹事與瀛臺

宴分韻賦柏梁體詩得水雲之榭臨滎澹句又

命聯句而公亦與焉奉文穆公諱居廬三歲大事克舉

服闋入都奉

命賚送

三朝實錄至

盛京珍貯旋補原官奉

旨進香北嶽恒山歸授內閣學士兼禮部侍郎視學畿

輔晉授禮部右侍郎尋轉左充

經筵講官丙子主順天武闈鄉試丁丑知禮闈貢舉以

任學政時失察監生邱允頂替錄科鑄一級

特恩補授太常寺少卿而曹太夫人訃至戴星而奔結

廬墓側親監畚揭寢食交廢嗚呼哀榮禮備公之事親

太常少卿視察郎是四級一字

終矣禮云終其身者非終父母之身終其身也報國恩綿世澤公以此終無貳道也

聖天子念文敬文穆勳在王室以公輔期公

丹地深嚴俾與二三元老出內絲綸試展其舟楫鹽梅之用服甫闕卽有署理內閣學士之

命復兼攝禮部事公以重聽復患脾洩懇辭禮部雖得請而閣務殷繁冰淵時惕隨

幸木蘭歸卽疏乞休或惜其去或榮其歸皆非公意也歸田後杜門却掃門無雜賓口不道錢刀足不涉公府清風亮節爲鄉閭所矜式成周之制鄉先生仕而已者

例入右塾教其子弟當事欽公行誼以禮請爲諸生之師青衿組帶之彥橫經問業非聖之書不敢觀非法之言不敢道以居仁由義端其趨以研經味道勗其學薰其德而德成材達者更僕不能數公居官以導揚皇化爲職業居鄉又以扶樹士類爲事功趨庭退學諸子皆能文章得氣以去者必使爲親民之官耕桑禮樂化民而成俗紆

九重宵旰之憂於萬一世篤忠貞豈以一官一邑自弛惰哉此公每飯不忘之初心亦卽文敬文穆翼子詒孫之家法也歲在辛卯正月二十八日薨於里第春秋七

十距其生辰甫半月而不及待娶王氏戶部侍郎璣女
贈二品夫人繼以俞編修元祺女封二品夫人子七人
紹堂乾隆甲子舉人江南涇縣知縣降補湖北興國州
州判紹壩四川雅州府經歷出嗣公弟之煒紹基乾隆
丙子舉人廣西東蘭州知州俸滿推陞安慶府同知紹
墀縣學生出嗣公弟應衡紹城紹墳紹班皆國子監生
孫七望麟鑑蘭慶驥禧孫女三人曾孫二人世德世求
公蘊寬中篤厚之德擅承明著作之才起家詞苑繼武
玉堂敬敷五教以教國子惇庸典禮以佐春卿持節畿
輔雲漢天章布

壽考作人之雅化入爲太常揚類帝禮宗之大典馨香
俎豆孚格人天敷歷清華無殊寒峻崇尚清靜似曹參
孝謹似石慶惟肅惟栗似韋元成和於天倪不戕於物
役不汨於勢利廻翔館閣遭際

熙時以爲太平之幸人則誠幸人也以爲皇古之天民
則誠天民也以爲鄉邦之碩宿則誠碩宿也某年月日
孤紹堂等將於東山衙之原穿王俞二夫人之窆而合
葬焉撰次行狀先來

乞銘銘曰

公稟精於淳曜兮潛蘊靈於川嶽託繼體於二勳兮紹

庭聞而先覺騁皇衢而攬轡兮之帝所而聽樂遨玉府
以婆娑兮議石渠而揚摧歷三監之清華兮集鳳池而
飲啄叶聖瑞以歸昌兮媿鳴岐之鸞鷲典三禮於秩宗
兮揚奉常之韶箭敷

醲化於邦畿兮緯經天而有倬陳堯舜以賡颺兮誦墳
典於

講幄陪論思於丹地兮掌

絲綸於黃閣睎韋平之世美兮匹前修之卓犖耳司聰
而不順兮脾有神而被拯匪避賢以引身兮豈韜光而
守樸匪泉石以心儀兮豈田園而志樂丹衷鬱而未抒

兮凜

聖恩之優渥矢孤忠以詒穀兮意硜硜而堅確卒飾巾
以待期兮篋鬢爪而洒濯灼荆燠以命龜兮樂石壘而
未斲撰銘詩以攷行兮邈流風而緬邈

文林郎行人司行人管理廣東電白縣知縣事顧
君墓志銘

君姓顧氏諱之珽字搢玉先世自上虞遷會稽再遷於
杭遂爲杭之仁和縣人高祖邦臣京兆倅曾祖謨命祖
大觀皆隱不仕考豹文順治乙未進士巡按湖北掌河
南道御史娶於虞繼娶於陳無子先以弟之子之璿之

瑛爲後筮宮以汪氏乃舉君君生有異質年十一爲學
官弟子十四貢於成均二十二貢於禮部三試禮部不
得志就謁選人凡四宰劇縣以屯田塞外功當擢守當
擢員外郎皆不克就仍以縣令終其宰三原也縣令日
用例皆取給於民百里重繭交相委輸雖貧羸皆不得
免君至首申其禁刻石著爲令民釋然若弛負擔當軍
興時比邑繹騷原獨特君以安比去任一邑若失慈母
號泣走送者殆數萬人繼宰石泉滿考晉行人旣得替
時安西城工孔亟上官檄君往君體弱不耐劇資斧屢
匱或阻君君毅然請行居絕域者三載躬親畚鍤城卒

就敘功晉一級

天子廉其能思以劇邑展其用仍

命管理廣東三水縣事而行人爲兼官三水爲兩廣要
衝商舶鳥集探丸之盜出沒其閒君至跡知盜藪戮其
酋羣小稍稍遁去建議於邑之蘆包口設立將弁以廣
邏警萑苻爲之一空調繁海疆知電白縣事治行如前
時中蜚語報罷旋得白然君自是亦不復有用世之志
矣君修行於門內事母孝事兩兄及女兄弟極敬愛誦
記數十萬言先友若毛檢討奇齡朱檢討彝尊吳徵君
農祥皆魁儒碩學雄長一世君操柔翰隨其後煥爛有

煒座爲之傾每治縣適歲大比必佐其主考官試士之
雋茂者咸模索而得之晚登羅浮窮九疑上趙佗臺賦
幾千百言東人讐焉旣歸里與里中三數耆老續南屏
入社之集章逢之儒瓶拂之衲交進輻輳並遊其門務
奇鬪險窮日累夕至鬻宅以繼酒食而君不厭也乾隆
乙丑八月二十七日忽邁末疾奄然隨化距君之初生
蓋六十有八年而其降辰則在康熙戊午十月十有一
日也娶沈氏封孺人博學鴻詞翰林院編修開平公女
有賢行前卒子男子四人長正謙國學生次建節直隸
雄縣丞次來泰次悅隨出繼舅氏子女子二人孫男三

人曾孫男一人越歲丙寅正謙等將葬君於小鳳皇山
之原以沈孺人祔幽宮伐石來乞子銘銘曰

艱厥遇以昌其詩奔走劇職劬不支淹數乃用薄宦羈
攬束文藻將安施劉昞不作實錄移燉煌莽闕四維
手執磬鼓鼓衆師金湯仡仡雄西陲不信視我豐功碑
炎微轍跡來何遲登歷未經羅浮奇振翰欲合風雨離
浮湘南下窺九疑壓裝劣有秀句隨胡天中壽不慙遺
雕鉢肝腎理則宜藐諸噉然涕綆頤月朝卜日除反支
日廿加一丁吉時帷荒黼火魚躍池毀宗躡行到水涯
令妻同穴盛禮儀漆鐙遠絕虬蜉窺乞我丹筆徵刻辭

道古堂文集卷四十一
昭在翠珉永勿隳

翰林院庶吉士嚴君墓誌銘

君姓嚴氏名璫字十區先世自汴徙臨安遂爲仁和人曾祖大法祖模皆不仕考儀煌康熙壬午舉於鄉初娶邵孺人生兄在昌繼朱孺人生君三歲而考見背朱孺人教之學生有異稟覆九經如瀉瓶水羈鼎爲文動中程度應縣童子試爲選首已而學使者責君賂不應輒擯不錄雍正甲辰乃用國子生名舉鄉試庚戌成進士改庶吉士旋患瘰癧請急歸調疴里門時母夫人屆壽五十方以節孝致綽楔之典築壽萱堂曲盡色養歲餘

疾少痊還京明年疾作卒於邸舍年僅三十有一蓋雍正甲寅歲五月朔也同歲生倪侍御國璉周修撰霽梁侍讀詩正爲經紀其含斂奴子兆宗遞其棺以歸時兄在昌方攝江西萬載縣事不得行服母夫人將以歲乙卯之九月四日葬君於北山大方井之祖塋以君少嘗兄事予知君行誼爲悉因命爲誌墓之文君修門內之行居處幽室必自修整雖家人不見墮容與長老言捧手負劍唯恐不下然勇於爲義告之急不以亡爲解友人吳嘉丙貧病以死不克葬君爲誌其窀穸并刊其文傳之薄遊淮陰鍵戶日課經史爲文一洗懦鈍之習孚

甲新意旬鍛月鍊冥搜不已至忘寢饋極意步天嘗疑
雍冀齊魯之墟與鶉首大梁降婁元枵之躔次多有不
合著論以發丹元子之疑又謂筆迹之妙關於人品鮮
發明之者集唐史能書人爲一卷他詩文多不存唯春
草碧色賦有能誦之者君生於康熙甲申十月五日娶
吳氏無子以兄在昌子震爲後銘曰

嚴維賢裔令德載光兩雛軒軒一覽一祥五采旣備德
輝乃翔中道折翅爲孤鳳皇方井之陰龍虎回斡幽宮
廣輪擗茨番闕輿藏馬反禮葬非渴誰歟刊銘慈母所
揭

達州知州陳君墓誌銘

居嘗謂能吏易儒吏難夫几案之才佐之以精勤措施
卽善而不能不怵於勢利不怠於宦成遷轉流易而真
意不存儒者所勿道也經術之迂也俗吏姍且笑之而
儒者卽奉以爲司空城旦之書施之事而治孚之民而
化此其人蓋閒世而一見之而吾得之於同年達州牧
盤屋陳君君壯而仕老而歸讀其書知其蘊蓄之深聽
其言論風旨知其抱負之大吾愛之敬之常舉以諷世
之有民社者而人莫之信也年運而往吾旣老而君已
嗟大耋矣今年正月十有四日棄養於仲子燮武林官

舍五月某日將葬于蘇州之某原先期來乞銘公之歿也吾不及視其窆也道阻且遠不得與於緋引之役余之負公也多矣嗚呼其忍弗銘君諱慶門字容駟一字渭川系出維揚明洪武時有諱貴者以軍功世襲千戶守官西安食屯地於螯厓遂家焉八傳至君王父召里公歲歉散粟常活數千人生子三人君考洛獻公其季也教君甚嚴期爲有用之學甫成進士從王徵君豐川遊明體達用盡傳其學以歸色養偏親不謀祿仕母夫人王督過之始謁選人得廬江令奉母之官盡紬其平日所切究者次第施行之修文廟築廢城廣漏澤設義

田崇禮教以正喪祭置常平以煦寒餓其尤著者邑民止知平疇種稻高阜皆爲棄壤爲市牛具仿北地種植之法親督墾闢豐穰盈積利賴至今他若祝回風而蝗不爲災牒獄神而鬼不爲厲至誠所感君不以爲異也其攝無爲也無爲古濡須地沿江上下二百餘里大半當水之衝前人議築頭壩增至二三四壩盡沒於水居民危不可支君躬探深淺之處於鮑魚橋鱗魚嘴二處役夫千人樹柳椿編竹束葦填土爲斜坡形又取近山亂石填擲水中水渟沙淤久而成洲不獨民免墊溺而舍和巢廬數州亦安堵無患矣其攝六安也州舊有水

塘環塘之田皆資灌溉議者欲盡地力謀墾塘以爲田塘廢則田荒州人病之時君適歸廬江父老數百人涕泣奔走請命於君君焦思擘畫開陳利害力言於上官得止旋晉牧亳州俗好羣鬪倚州役爲爪牙張威扇燄闕如虢虎禽治其魁獍役多至七百餘人悉杖而遣之而悍俗爲之一變俗好訐訟牒訴山積君行古鄉約之法使之宣導百姓排難解紛日坐廳事自辰至酉處結者無慮三數十案不數月積牘頓清澆風亦息州舊隸鳳陽幅員千里濱湖窪下久雨則湖溢遇旱則蝗蝻肆生君相度地形用秦中收淀之犁法加以挑濬地下者

漸高水之渟蓄漸歸其宿一勞永逸農穫有秋旣而母夫人棄養哀毀骨立戴星而奔葬母後便有終焉之志皇上龍飛之元年以大臣薦補達州知州州環萬山歲常苦旱爲購旱稻之種教民樹藝始無艱食之憂州鄰巴郡桑柘甚饒君買桑徧植教以分繭繅絲之法蠶利遂與巴郡畧等川東流民日多官廩不能徧給腴田半爲緇流隱占君悉釐定爲義產以贍之所活無算於治西建宣漢書院禮聘名師指授文法文教漸興科第鵲起其治悉如在廬江時道大力充所在奏績然猶未竟其所施也未老懸車以病乞歸著仕學一貫錄教二子

以省刑勤政之道往來蘇杭二郡二子凜白華潔白之
養所以娛適君者無不至寒疾忽嬰奄然順化春秋八
十有一君力行勇而耆學勤遇家忌必素衣藉蓐悲形
於色以急告不以亡爲解隆親急故蓋其天性而利濟
之見于當官者則湛深經術設誠致行與君進退相終
始嗚呼可不謂之儒吏矣乎君娶于何繼以劉繼以騫
並以子焱貴

誥贈宜人焱江南蘇州府同知燮浙江嘉松運判女六
李惺王璠王景文靳維昌李本立楊本仁其壻也孫三
人廷實廷憲廷棟銘曰

不善爲吏吏而商容頭過身心甚長操刀使割母乃傷
不善爲儒儒亦俗其行姝姝欲逐逐辟以方輪轉長轂
吁嗟陳公今純儒胸有太平經國書舍之則卷用則舒
盤錯屢試屢效績廬江巴江共流澤治行吳公書第一
生當立祠沒配社未老收身世蓋寡治譜猶爲世傳寫
紹聞有後心魂恬食子收子能相兼禮不反葬夫何嫌
青山迤扈元宮夷斲石考行無溢辭繩兮蟄兮孫子宜

汀州府同知汪君墓誌銘

君名郊字浚臣號南野姓汪氏先世自休寧來家於湖
遂爲歸安人曾祖考諱以澄刑部陝西司郎中祖考諱

文樸太學生考諱亮采戶部河南司員外郎君讀書目
數行下搜抉幽隱辨析端委將以爲世用而屢躓舉屋
不得志以薦起家莆田令莆俗豪梗難治君隨俗爲張
弛威惠並洽風潮陡作沿海田畝盡沒君首施數百緡
募人重建李長者隄民得無患輕訛少年藏匿山谷聚
兵械習技角力衆至數百或以告將弁請發兵往捕君
方病寒嗽取方寸紙書數字召其族長老長老震恐率
其子弟捆束槍梃扶服階下叩頭謝死罪君悉焚其兵
縱遣之上官廉其能調繁侯官邑蒞省會認詞不復暇
君益自淬厲遇事勇爲苟及他郡邑有疑獄輒來讞民

以爲神君晉汀州同知攝守事攝漳州南勝同知攝福
清場務其治一如莆田時治狀爲八閩第一
天子廉其能將畀以方面之任登進有機而戶部君以
病隔終於家訃聞君搶地欲絕戴星奔喪慮建溪迂曲
不易達閒道走鄱陽湖風迅濤駭舟幾覆者再僅而獲
免憂危震撼痛定思痛而君不起之疾實始中此抵家
不數月竟以毀卒年僅四十有三時乾隆六年十二月
二十八日也娶于黃有子男子三人曰啟瑞太學生曰
啟璠曰啟琰有子女子二人一字金可奎君生長華廡
而勤學逾寒暑工詩善書騰躍藝苑施於有政卓卓可

紀若此以是知其學之有本也某年月日孤子將葬君於某原友人仁和宋振業次君行事爲傳簡而核不虛美以予與君交久且善宋君介以請銘銘曰所居理不自喜善張弛官屢徙止乎此其命也已琢幽珉徵惇史君有子

旌南府通判姜君墓誌銘

君諱震字念劬號野鶴姓姜氏世家萊陽遠祖淮以禦寇功拜懷遠將軍高祖瀉里邑諸生萊陽破守城死幼子暨三子婦一女皆殉節事聞贈光祿寺卿諭祭葬諡忠肅曾祖採禮科給事中建言廷杖謫戍宣州衛國亡

流寓吳門遺命葬敬亭山下門人私諡貞毅二子長安節居宣城守邱墓次實節隱於藝圃卽君祖也居吳守祠虎邱有二姜先生祠吳人以祀貞毅及弟行人塚也父本仔廩貢生以君貴贈儒林郎君三歲失母哀號擗踊如成人及長力學受業長洲何焯學者稱義門先生者是也親經指授文有家法弱冠占金山衛籍爲博士弟子旋改萊陽繼貞毅不忘故鄉之志一試卽冠其曹餼其米廩循例入太學應京兆試俛得復失以能書錄入一統志館書成議敘州同非本志也筮仕廣西太平府之思州思州南界銅村爲交人入貢孔道君豐其贍

給而猺民無供頓之擾夷情丕變一洗其跳刀走戟之習逮遷秩攀轅泣送走數十里不絕前後攝思陵上思二州事思陵訟案塵積蛇蟠蚓結不可爬梳色聽辭聽君以一月了之上思有客於他省同里某知其金多僞約俱歸戕之於中途投其尸於水子訟於官但云父爲人所殺而不得主名君偵知某故市井無賴歸自遠方驟致千金驗其年月與死者歸時合令人以好語致之旣至君熟視之曰此殺人賊也某目動色變嚴詰之遂吐實竟置於法一境以爲神君郡守白其事于上官將列薦剡適部推山西朔平府通守遂寢朔平治寧遠鎮

旗民雜處繁劇號難治君壹以忠信慈惠臨之不恃凡案之才氓庶傾心吏胥斂手學優則仕之效也會裁缺改銓湖北施南檄修江防親行相度帑節而工固心計精詳是時君年已七十餘矣移疾請告大府雅相器重固畱不得遂歸亡何長嗣不祿次子晟官比部迎養京師惓惓先人祠墓不數月卽旋里越明年飾巾待期考終牖下春秋八十有二時乾隆三十五年十二月六日也娶畢氏封安人有淑行君在京師而贈公棄養附於身者勿之有悔赤手搢拄使君無終天之恨慮姜氏之在吳者嗣續不廣爲君多置妾侍其識大體若此乾隆

十有九年二月十九日疾終上思官解子三人世昌元和縣附監生晟乾隆丙戌進士刑部江西司郎中世旭則側室王氏出也女三人王友信陸興祖何福綏其壻也孫三人宗發宗達宗魯孫女四人曾孫一人紹烈君天性純摯承貞毅之風篤門內之治贈公歿遺有幼子飲食教誨以至授室視己子有加語畢安人曰吾寧薄于子弟不可不厚也女弟適申文定公元孫隨任雲南而卒不克歸葬募人行萬里遷其棺以歸萊陽有田數十頃貞毅所遺爲君應得之產君歸籍族人以其田來歸君勿受仍推爲祭田宦歸盡出俸金以脩祠墓卹族

黨之貧乏者居甥館畢氏奩具甚盛外家中落以服珥悉歸之俾外舅遄反浙西故里有三喪未舉春秋窳窳之事旣固且安皆君力也晟將以某年月日祔葬君夫婦於長洲縣九都制字圩祖塋之次來杭乞銘安人本錢唐邵氏父楷諸生少鞠於舅氏愛逾已出不忍忘也故氏畢銘曰

君所承者忠蓋丕基逮君而顯將大厥施一經相嬾仕非華資捺刀使割疑獄斧斯優游半刺迫於崦嵫嘉偶作述淑慎爾儀齊牢合食同穴奚疑武邱之陽松檟蔚而貞石佺佺埋幽有辭謂我惇史言絕讐欺石有時泐

銘不可移

天台縣教諭江君墓誌銘

君諱作楫字汝舟號警堂姓江氏系出濟陽之考城當
梁世金紫光祿大夫淹出爲宣城刺史子孫遂家宣城
再遷旌德三遷至歙遂爲歙北之豐瑞里人曾祖考某
祖考某考某隱德不耀君穎悟異常兒甫就傳誦數萬
言已能效世俗所爲詩古文辭未弱冠寄籍浙江之金
華爲學官弟子旋餼其米廩之粟歲癸巳

聖祖仁皇帝萬壽造賦近萬言欲獻之不果戰藝屢屈
而爲文益銳將貢成均矣會

世宗憲皇帝踐歷

詔開特科君適領鄉薦主司奇其文擬置第一數日更
第九君聞之不憾也試禮部復不得意乃求爲教職之
天台造士有法士多樂就之比去走送數十里外繹繹
不絕君生有賢哲之資修行乎門內與同產無閒言弱
弟早死哭之以詩護誼不已過時而猶悲撫其孥恩禮
備至久之忘其爲惇嫠也與物無競諍罵之聲終身不
挂於齒頰以急告視家所羸卽推與不以德自矜春秋
六十有四以某月日考終牖下時雍正歲在甲寅也娶
某氏有子男子四人皆爲儒長咸寧乾隆戊午舉人將

以某月日葬君于虎形山之原來乞銘銘曰
先生之行誼備於詩白華常棣何施不宜嗚呼知匪難
行之孔艱徵銘久久用警庶頑

道古堂文集卷四十一

仁和 杭世駿 大宗撰

墓誌銘四

封承德郎江南淮南儀所監掣通判查君墓誌銘
君姓查氏諱日乾字天行高祖考秀自江西臨川北遷
順天之宛平曾祖考忠中前明萬曆己酉科副榜祖考
國英國子監生考如鑑江都縣縣丞以勤死官君生三
歲而孤母夫人劉以育以教姊聳山陰馬章玉知儀徵
縣事迎之往除夕陳諸裘服恣親串所欲取君年甫十
二獨端坐不爲動既長奉母來天津時倉場總督洪公

尼喀順天府尹劉公元慧皆先人生死交數請相見久始報謁卒不一通竿牘有爲讎所誣陷京兆獄獄急闔室聚泣不知所爲君聞之立白府尹直其事德君甚奉三千金爲壽君笑曰某故貧肯爲京兆鬻獄哉卒却之後用鹽筴家漸起長蘆逋賦累萬艱於稽核

朝使來熟君名坐之堂上諏詢條目君口陳手畫洞中窾會匝月悉定又以商力彫剋陳議爲善後計使者用其言上請利貽至今天津爲禹貢九河下游白衛二河水遇淫雨輒建瓴而下孤城縣水中廣野無廬井君倡首設賑屢拯民于墊阨全活無算制府彭城公上其事

天聽匪遠寵賁旋及環城隄岸如渠黃口老君堂教場單街等地衝決不時夙稱險要君謂宜先事修築從臾蹉使疏入得報君親督畚鍤增高蘊厚卒用安堵長蘆奏銷屆時官商屢以稽緩呈吏議君措施有方藉以全者不形德於屑吻城西旅舍數十區每歲逼除客之不能舉火者君陰爲償之歷久無怠色晚乃救家事放意山水抱德煬和用臻大耋而未疾不嬰死期豫刻斯亦奇矣君長身鶴立音旨洪朗料事若神應變不測攬環贈珮之好幾徧天下而生死不相負山陰王揆長洲談汝龍會稽陶良玉先後客死京師皆親視含斂以輜車

數千里歸其喪山陰胡捷俞啟文歿無以爲斂皆始終
理其後事太原郭氏貲累鉅萬託藐孤于君君翼而長
之弭其內難家賴以不毀母夫人大革時緣事繫都門
不能盡大事痛毀幾絕得歸營葬築室墓旁三年不忍
去墓園所自號也讀書不爲章句於史事尤精撰史腴
若干卷嘗曰學不爲世用縱文采彪炳猶瑤櫜之不可
以川玉弦之不可以矢也雍正九年以子爲義貴

封承德郎江南太平府通判十三年

覃封如故改江南淮南儀所監掣通判配山陰馬氏子
男三長爲仁次爲義次學禮女一適山陰李元皆側室

徐州王氏出孫男六人孫女九人君以乾隆六年五月
十二日卒年七十有五訃旣告知與不知皆太息其行
義戚屬號咷失所宗仰余與君諸子交特深重以婚姻
之好孤子等將以乾隆七年二月十二日葬君於三河
縣百草溝之新塋哀前事來乞銘銘曰
讀一篋書將以爲世須孰守而窒孰施而迂推之行之
管此寸樞望德而趨有諾勿逋迹其耐嘔豈爲鄉閭往
不可諛來者庸可誣徵我惇史盡而不汙

朝議大夫候補主事加二級馬君墓誌銘

君諱曰瑄字秋玉別字嶰谷姓馬氏系出漢新息侯援

迨宋末造丞相廷鸞隸籍鄱陽生五子季爲端益始遷
婺再傳爲真三始籍祁門世遂爲祁門人曾祖大級前
明諸生祖承運州倅始家于揚考謙州司馬兩世皆以
君貴贈朝議大夫妣洪氏生妣陳氏皆封恭人洪恭人
生二子長曰康早殤次曰楚以後世父陳恭人生君及
季弟曰璐君至性過人事贈公暨兩恭人以純孝稱及
長德器端凝不苟訾笑授經後據案堅坐矻然如老儒
說經嶽嶽不可撼難兄穉弟考校文藝評隲史傳旁逮
金石文字自相師友後雖授室風雪淒其未嘗不抵足
聯牀恒曰吾三人如一體不能暫分也年二十三歸試

祁門充學官弟子贈公棄養仲兄又以哭母哀毀而卒
君搢拄艱鉅而前業克光以濟人利物爲本懷以設誠
致行爲實務爲粥以食江都之餓人出粟以振鎮江之
昏墊開揚城之溝渠而重隄不病築漁亭之孔道而擔
負稱便葺祠宇以收族建書院以育才設義渡以通往
來造救生船以拯覆溺冬綿夏帳積死醫羸仁義所施
各當其阨若夫傾接文儒善交久敬意所未達輒逆探
以適其欲錢唐范鎮長洲樓錡年長未婚擇配以完家
室錢唐厲徵君六十無子割宅以蓄華妍句甬全吉士
被染惡疾懸多金以勵醫師天門唐太史容死維揚厚

賻以歸其喪旬吳陸某病旣亟買舟疾趨以就君曰是能殯我石交零謝歲時周卹其孥者指不勝屈也詩骨清峻閉戶湛思輒壓儕偶合四方名碩結社韓江人比之漢上題襟玉山雅集性耽山水京口三山中吳洞庭林屋之勝足跡幾編著詩十卷今世所行沙河逸老集是也

翠華南幸迎

駕江壖

天子親問姓名兩

賜御書克食寵遇優渥是冬入祝

聖母萬壽於慈寧宮荷豐貂宮紵之賜君感激奮勉凡遇公家之事不避艱險往來金陵攝山中賜歸及旬竟以不起春秋六十有八時乾隆乙亥六月二十一日也誥封朝議大夫候補主事加二級
欽授道銜

恩加頂帶一級配歛邑汪氏

誥封恭人後六年卒無子以弟曰璐子振伯爲後乾隆某年月日日璐卜地於廣陵某山之陽合葬於陳恭人兆次來乞銘銘曰

山巒巒兮水沄沄有弟蓬蓽葬厥昆松謾謾今日杲杲

有子扱衽收厥考涕唾貨賄不足言義問出地如雷奔
篋無遺金哀此憚人廩有仁粟復我邦族生能廉頑沒
可祭社舌傲筆剗最其大者嗚呼天心至理難假以君
豐博宜享康茂胡算不盈而止中壽霄路旣登鳳羽其
翮胡甘斂退名位不大豐其清聲嗇以厚實元堂琢銘
我無慚色譔德考行視此樂石

候補主事趙君墓誌銘

君諱方觀字用賓號松廬姓趙氏世爲順天之武清縣
人王考之篆有聲膠庠以兄左僉都御史之符之子珣
爲後卽君考也康熙壬戌成進士授中書科中書舍人

擢吏部累官河南提學僉事君生五歲喪其所生哀慟
若成童長益穎異十五爲學官弟子越歲餼其廩米康
熙壬午舉於鄉遊道日廣華問洵美三就禮部不見收
一避嫌不得試訖無愠容已而僉事公視河南學君侍
行聞詩對易出其家法以佐提論八郡一風英淑蔚起
滿歲僉事公僑寓黎陽將老焉而君亦不得志於進取
循例謁選人會僉事公疾大作與弟方頤瘁力醫藥不
可請禱不可請減已算比棄養毀幾滅性服旣闋大興
黃公叔琳以吏部左侍郎出撫兩浙廉君賢薦於朝
名見稱

旨立命以主事權杭州北新關稅關務向領於撫臣檄
一丞倖主之官攝而權輕豪胥舞智囊橐爲奸故商困
而額屢缺君下車搜剔前弊杖其魁一切陋例悉報罷
不數月黃公以蜚語去後事者疑君有私密相偵察吹
毛索瘢不寒而栗遂請解組亟歸而難君者卒不得一
閒乃自知其中讒之深也君有用世之才一試不得意
既歸不復求出推落崖岸浮湛閭里銷聲匿迹近十五
載以乾隆元年月日考終牖下年六十有六君篤于門
內之行事繼母如母事兩叔母如繼母一味之甘必獻
而後嘗補衣縮食躬自儉約解推所及累什百而不惜

也其孤脊將以某月日卜葬君于北倉先塋之次以配
卜宜人耐宜人固安名族侍御諱峻超之女博習書傳
通識大體先君二十年卒君有六子九女子惟脊存女
殤者五嫁者四皆士族觀察晁君親弟子也代脊來乞
銘銘曰

豐其文不豐其遇讒夫孔昌力杖拄卷而懷焉仁義寓
北倉之原美幽宮月夕卜夕懿壺從維千百世銘永終
封儒林郎衢州府學教授翟君墓誌銘

君姓翟氏諱之瑞字龍文號溼含先世自汴來杭居仁
和縣臨江鄉曾祖明宇前明處士祖朝英舉鄉飲賓父

士奇國子生

贈文林郎母施氏

贈孺人生三子君其季也幼侗儻有大志讀書自塾師所授外雜覽史籍旁及五行三式之學臨摹古人墨蹟作擘窠大書躍馬左右射跌宕豪縱意不可一世弱冠理家政偕伯兄璘侍堂上曲盡孝養嚴父棄養時伯仲皆先卒君獨任大事哀毀如禮卜吉西湖之積慶山葬當冱寒說者謂築壙土欲不越宿越宿則乾與濕強爲黏屬春氣發蟄久仍離渙君感其說親操畚杵七晝夜趨事風雪中事歲買田築室以供祭事藏主祔之所君

用財有程限至是以先人窀穸之故費幾不貲前售地者以益價脅君於訟屢讞直君猶未已或說君曰彼挾已葬之勢作無厭之求益退讓益健并力而致於理彼且避不暇矣君曰吾故熟思之吾先人厚德起家今當窆兆而使人獲戾非先志也終不校訟者亦息母夫人卒哀禮一如前時從朱子分葬說別選地龍門山松楸版築獨力任之不以預兄子也嗚呼君之於其親也養生送死如此其盡禮也大本立矣遠族翟欽甫君德等代絕數世皆厝淺土爲買地作十五冢三時祭之兄子永無子娶妾有身不相安君畜之別室子婉而復三黨

中有衰替者或喪不能殯者嫠而無倚者壯未有嗣及昏姻失時者皆量力濟其厚薄君急人之病其天性而能極其志之所欲施又如此乎其肫且摯也老益篤於青烏青囊之書手自評校寒暑不輟著有地理評論驗方集鈔若干卷遊宴飲食之會概謝弗與有以父母葬事請者欣然從之風雨登頓不恤也按古方製諸藥療貧者有乞雖夜必起行之且數十年同里吳穎芳嘗論君有三反性剛毅不可犯而或以非禮干之輒恕不與校御子孫未嘗假以辭色而畜輿臺僕從甚寬食疏衣布不爲已身妄費一錢而于致孝養周急矜無資不計

其費是真能道君者君寡嗜欲善攝生迨老猶禁寒暑儼捷如少年偶示微疾遂不起屬纊時鼻筋垂寸許汗拭皆香蓋夙具靈根而不自戕賊彼教之所謂宿因吾儒之所謂全而歸也時乾隆壬午十月二十五日距君之生康熙辛未四月二十一日春秋七十有二候選州同知以次子灝進士官衢州府教授

晉封儒林郎配高氏

封安人有賢行子九人曰濤曰灝曰泮曰泰曰潮曰涵曰治曰瀚曰澍泰早殤潮澍先卒女一人適黃槐孫八人以權以彬以根以棻以挺以稜以標以東曾孫熙元

熙敬孤濤等以甲申十一月二十五日葬君蓮花峯陽
君所自相也來乞銘濤瀨偕余交游久知君潛德中銘
法乃銘曰

禮墓大夫執斧蒞葬堂斧夏屋孰治孰創收子葬翁斬
版而封霜櫟雨杵克艱厥躬猗吁仁孝施由親始孰爲
窮嫠孰爲窶子病于我乎藥死于我乎崩歸妻歸妹我
完我聘民之無祿奪公遽速不相不歌傾壙走哭蓮花
之峯閔此幽宮剖石誅德辭約義豐

贈儒林郎汪君墓誌銘

汪君扶搖旣沒之九年其孤韜英將卜葬於長興之鳳

皇山先期來乞銘按狀汪氏先出自魯成公少子六十
一傳至大四公始遷江南遂爲歙之休寧縣人祖考建

烈

誥封奉直大夫考勇錫

敕封文林郎君名純扶搖其字也少而岐嶷秀異寒鈔
暑講書若宿讀筆飛墨騰文若宿構以是絕爲大父所
憐愛在羣從中獨有銅槃異饌之奉年十八爲諸生祭
酒兼該羣業於春秋經尤邃謂金華宋氏之論自元以
上言春秋者凡五變今則變益多而其流愈下青田之
明經環谷之要訣祇以供末學科舉之用降是而匡解

明微諸編則又變諸生爲學究爰是銳意傳疏左右采
獲抉幽探微雖儒宿莫敢抗手閔後進皮傳目瞇杜鄭
王馬之書舉場發策緬緬紛紛蒙目張口乃條食貨刑
法邊防州郡數大政州署部居補山堂之考索續源流
之至論以饋貧藥儉其窮究元本若此遭大父喪容色
貶瘁嘔血數升丁所生憂齋居墓廬三年不入內春秋
諱日素服上食擗號孺戀終身以爲常有四兄皆能
文事昕夕過從清談干雲振衣躡履親執食器友誼謙
篤感動隸人初娶于徐未廟見以渴疾卒過時而腹悲
繼娶於陳雅相禮重不畜華妍其內行醇謹蓋天性也

晚築畫溪草堂於雒城遺編鬻翰旁魄罔羅巾幘之歡
徧于大江南北扁舟造門莫適賓主捶琴刻燭造韻立
成君外和而內毅倨倨自立期爲有用之學屢試不得
志雍正丁未以疾卒於長興之里舍年僅四十有五子
一人卽韜英州司馬

敕授儒林郎贈君得如其階銘曰

於維春秋微婉義悉淵源夙承助逮匡質朱墨別異微
旨廼出嗣永嘉陳不改科律莞彼荆舒新義杙孰農師
佐之歷駮蹇躡權衡有敞集解有轍牙角撐拒未究曲
直鏗鏗康侯戇議盈帙魯史聖文書法兩失黃澤而降

正學在歛寬以纂疏汭用師說師山考傳疑誼則闕有
儒一生汪罔來葉世歷五變鴻論秩秩爲左鍼育爲梁
起疾爲羊輪攻海涌嶽立誅諛發潛視此丹筆昊天降
訥車軸早折靈幽體翳遺著滿室我造銘辭徵以素業
授經何人鑒於哀石

封文林郎許君墓誌銘

吾讀九靈山人所撰殷德輅墓志何其與吾友樂亭許
君相似也山人序德輅所折獄者八九事出其被冤者
多至二十人釋其株逮者多至八十人晚年憂先人墓
廬圯廢謝事歸治田築室於先墓之側屬其子從大儒

先生學以紹隆其先業德輅起家縣吏終縉雲縣幕而
其治效乃與漢于公張釋之等豈在居顯位都尊官哉
樂亭與吾偕遊黌序有聲名未三十卽棄諸生服出叅
人幕余嘗哂其急於謀食不知掇科第取青紫無顯揚
之志旣而其子鉞舉於鄉又三十載而其孫學范復舉
京兆試余固謂讀書不食報不於身必於子孫則又疑
其如于公之有陰德而莫得其端倪旣而憬然悟鼎然
典曰其在斷獄乎獄有小大歐陽子云求其生而不得
則生者與死者均無憾也君持此意以終身獄之有冤
濫者寡矣至其小事外之株繫貧民失業或以畏死或

以飢寒疾疫而瘐死此治獄者不失之踈緩卽失之迂謹也君行年七十有六經歷燕齊秦閩之區者踰四十年此四十年中所全活者或二十人或不止二十人所省釋者或八十人或不止八十人積功累行而不自知卽其子孫亦不知旁觀之人孰有載筆而爆其事者此于公所謂陰德也許氏自再從以下四十餘棺未葬君深以爲疚買地於橫山之陽自平涼命孫學范歸營春秋窀穸之事依古族葬之禮無問親踈遠近悉斬板而封之及學范成進士從弟堅曰此吾兄澤及枯骨之報也嗚呼君於斷獄所謂生死而肉骨者不知凡幾而謂

自炫以求報哉責報於天尙可謂之陰德哉君名堯堂字曾祖維新有鶴峰集十五卷祖機邑諸生有萍影集十卷父戾以孫貴馳贈如其官三世皆隱而不耀至君子孫始以科第顯弟莖早卒遺孤二曰鈞曰銘教之成立長而筮仕皆有几案之才筮宅煖契以妥闔族之幽宮鈞銘所行視也君晚景恬愉就養子舍優游觀化歲在庚寅六月七日考終鹽茶官署娶海寧張氏先君十八年卒贈宜人子二鉞平涼府鹽茶同知鑑國子監生女一適錢邑庠生趙鏐孫三學韓殤學范乾隆壬辰進士學文尙幼曾孫二乃順乃大曾孫女三人鉞自

平涼反杭將以某年月日穿張宜人之窀而合葬焉求
如九靈山人銘其墓而不得其人也以屬余是中銘法
宜爲銘銘曰

刑鼎菌蠹宜饗殮中涵厚澤種子孫晉州虎冠晝殺人
狡援獨子畱侍親以李代僵全厥元法官向以故殺論
望天無路終戴盆有父控訴駢駢奔三刺三又宏

天恩爲理出之以不寃毳衣如焚車啍啍輿誦載路喧
平反穀梁攘善譏伯尊我詰過庭知其原例其用意他
可援胡取一一形諸言不信視我銘辭傳



